

Die Gsalzene

Hämmir als Kind Banaane im Spinaat verdruggt
Hett's Mammi gsait: «Spiil nid mit Ässe, bisch verruggt!»
Hitt bringt so Gschlüüder d' Lyt uf anderi Gedangge
Jetzt haisst das grieni Smoothi und koscht silbe Frangge!

Terramation, baid wird me Lyyche komposchtiere
Denn isch verbyy mit Äardbestattig und gremiere
Doch wäg' de Schaadstooffwäärt sinn gwissi Lyyche gammilig
Drum mien Bolyttiger ab denn in d' Sperrguetsammilig!

E mängs im Lääbe hett konkreeti Pharallele
E Byspiil dodrfoo wämmmer Eich kurz verzelle:
Bi Durchfall und Eleggtroauti ischs esoo
Dass immer Schiss hesch nimm zur Zyt deheim aazkoo

Bim Schwyzer Mylidaär sinn Niete an dr Macht
Korubzioon, Inkompetänz und Leaks - guet Nacht!
Drum schleen mir vor, das VBS – es isch zum Fienne
In «verwirrte Bacheli und Stümper» umzbenenne!

In Bundesroot muess aine wo dert harmoniert
Missginschtig und e Schwaafli, wo gääm intrigiert
E sone Suechi isch halt oft e Lotteryry
Doch die hellschi Keerze muess dä jo nid syy
In Froog kämt us em Wallis unsre « Il Bambino»
Dr Obermafia pate Gianni Infantino!

Wär sotti d'Schwyz am ESC rebräsentiere?
S Brofyl isch glaar: E Draamaqueen und au e queere
E Bäaggistimm, im Waansinn oder kurz drfoor
Mir schleen dr Globi und dr Eric Wääber vor!

Mir Gsalzene hänn jetzt e Studie publiziert
Zur gschlächterinklusive Sprooch dieff recherchiert
Genderresischtänti Weerter gitt's vill znenne
Im Verglyych macht doch dr Maa aidyttig s Renne
Ängel, Star und Boss sinn do ganz byspiilhaft
Für d'Fraue blyybt nur Zahnfee und Reinigungsgraft

Und no dr Monscherväärs

Tralali und Tralala
Waale in de USA

Und scho wider – s'hett uns gsträält
Isch e senile Räntner gwäält

S'gitt Sache, die kasch fascht nid glaube
Die dien dr schier dr Atem raube
Nur imme Land vo Gränzdebile
Ka sone Gloon e Sieg erziele

Worum hett är die Waale gwunne?
Er hett sich uf Stammwääler bsunne
Und das wäre im Konkrete
Rassische, Alkis und Prolete

Duesch gärn dümmilig ummepööble
Und deheim di Frau vrmööble
Gheersch zue de hölschte Nüss uf Äärde
Kasch bim Trump Minischer wäärde

Im Kabinett hett's nid vyyl Fraue
Drum duet's dr Trump e bitz umbau
D'Stormy Daniels – s'freut ihn seer
Kümmret sich um dr Verkeer

Dr Trump isch nooch am Läbensänd
Und spyyrbaar wytgehänd demänt
Drzue isch er wohl schlussamänd
Tendenziell inkontinänt

Drum brauchts – wo immer er au isch
In nöggster Neechi Wiggeltisch
Und die sotte - muess me saage
Rund 150 Kilo draage!

Dr Donald isch ganz generell
E biirebitzli griminell
Zum alli Haftstroofe verbiesae
Wird er 200 wärde miesse

Am eerschte Amtsdaag wird's konkreet
Er unterschriibt 100 Dekreet
Ei Hoffning duet do zmindest blyybe
Er ka si aigne Namme schryybe

Hett's Glyymaabkomme vrloo
Duet Äärderwärmig falsch vrstoo
Er hett wirgigg kai Erbaarme
Mit de Schwuule und de Waarme

Ai Refoorm isch nid z vermyyde
Deerfsch Pommes Frites nur no gweerwääg schnyyde
In Springfield - er hett's nid vergässe
Deerfsch Hind nur no zem Zmidaag ässe

Insider die bedoone aber
Dr Trump sig schyynts e Dierliebhaber
Drum strääli er vo hinde fiire
E Vogelnäschtl uf si Biire

Dr gueti Gschmagg, dä fäält ihm schlicht
Schmiirt sich Sälbstbrüner ins Gesicht
Drum isch er – und das isch stupänd
Dr zwaiti farbig' Breesidänt

Er maint, es wär kai grossi Mie
Bim shoppe Grönländ yynezzie
Wenn er scho draa isch wär's z'bedängge
Me kennt ihm grad no Ziin schängge

Und me ka's kuum ignoriere
Dr Trump duet d'Schwyz au inspiriere
Dr Bodesees dä haisst ab morn
Neu denn «Golf vo Romanshorn»

Die Situation kennt eskaliere
Wie sotti d'Schwyz druff reagiere
S' gitt nur ai Wääg us däre Noot
Die Gsalzene in Bundesroot!

Die Gsalzene findsch unter www.diegsalzene.ch

Wotsch d Fasnacht mol vo inne gsee - kumm doch zue dr BSG!
www.schnitzelbangg.ch